

ՀԻՆԳԵՐՈՐԴ ԴԱՐԻ ՀԱՅ ՊԱՏՄԱԳՐՈՒԹՅԱՆ ՄԻ ՔԱՆԻ
ՅՈՒՐԱՀԱՏԿՈՒԹՅՈՒՆՆԵՐԻ ՄԱՍԻՆ

ՀՍՍՀ ԳԱ ԲՊՐԱԿԻԳ ԱՆԴԱՄ Վ. Ս. ՆԱԼԲԱՆՅԱՆ

Հայոց գրերի ստեղծումով նոր հորիզոններ բացվեցին ազգային ինքնուրույն մշակույթի հիմքերի ամրապնդման, նրա հետագա վերելքի համար: Գրագիտության տարածմանը զուգընթաց Մեսրոպ Մաշտոցի, Սահակ Պարթևի, նրանց աշակերտների ու հետնորդների եռանդուն ջանքերով Հայաստանում ծավալվեց իր ժամանակի համար, իրոք, եզակի շափերի գրական շարժում: Դարի հրամայականը, հարկավ, հայալեզու գրականության ստեղծումն էր, որին վիճակված էր դառնալու զորավոր պատվար՝ ընդդեմ օտարի բիրտ տիրապետության ու միաձուլման քաղաքականության, ընդդեմ գալիք արհավիրքների:

Տարակույս չի հարուցում հայոց հին դպրության սկզբնավորման արտասովոր բնույթը. այն տեղի ունեցավ ոչ թե սովորական, աստիճանական վերընթացի, այլ զորեղ թռիչքի ձևով, որ, ինչպես հայտնի է, առհասարակ այնքան էլ հաճախ չի հանդիպում ժողովուրդների մշակույթի պատմության մեջ: Հաղիվ թե սխալվենք, եթե ասենք, որ V դարի հայ մատենագրությունը պատկանում է համաշխարհային գրականության՝ ցարդ մինչև վերջ չվերծանված առեղծվածների թվին, երբ մանավանդ նկատի ենք ունենում երկու կարևոր հանգամանք. նախ՝ ինքնուրույն պետականությունից զրկված, հոգևոր կյանքով պառակտված, օտարների տիրապետությանը ենթակա Հայաստանի քաղաքական ծանր կայությունը, և երկրորդ՝ երբ հիշում ենք, որ տվյալ պայմաններում ազգային դպրության սկզբնավորման փուլը միաժամանակ եղավ այդ դպրության ամենաբարձր աստիճանը առաջիկա մի քանի դարերի համեմատությամբ:

Ի տարբերություն հին և միջնադարյան այլ գրականությունների (ինչպես, ասենք, ռուս), որոնց առաջացումը տեղի է ունեցել թարգմանականի հիմքի վրա, հայոց հին մատենագրությունը սկզբնավորվեց թարգմանությունների զուգընթաց, ընդամենը մի երկու տասնամյակի տարբերությամբ՝ միանգամից հրապարակ հանելով ինքնուրույն գրականության առաջին նշանավոր հուշարձանները, ի մասնավորի պատմագրության դասական ստեղծագործությունները՝ Կորյունի ու Ագաթանգեղոսի, Նղիշի ու Խորենացու, Փավստոսի ու Փարպեցու սյուսմական երկասիրությունները, ինչպես և Եզնիկ Կողբացու փիլիսոփայական-աստվածաբանական հայտնի տրակտատը, որով ազդարարվեց ազգային մեծ գրականության ծնունդը: Նվ սա հայոց հին մատենագրության սկզբնավորման ու ձևավորման պրոցեսի մի կարևոր առանձնահատկությունն է:

Հայ գրականության սկզբնավորման շրջանի դասական ստեղծագործությունների գաղափարական բովանդակության հիմնական միտումները, նրանց պատմափիլիսոփայական ու գեղագիտական որոշիչ սկզբունքները թելադրվեցին ժամանակի ազգային հասարակական-քաղաքական ու կրոնական կյանքի յուրատեսակ բարդ հանգամանքներով:

Միանգամայն ակնհայտ է V դարի դպրության վիթխարի նշանակությունը իր ժամանակի հայ իրականության համար: Բայց նույնչափ ստույգ է նաև նրա հսկայական ազդեցությունը հետագա դարերի ազգային հոգևոր մշակույթի գրեթե բոլոր բնագավառների վրա՝ ընդհուպ մինչև ուշ միջնադար: V դարի հայ դպրությունն ըստ էության կանխորոշեց հին և միջին դարերի ազգային պատմագրության, գեղարվեստական զարգացման, փիլիսոփայական ու գեղագիտա-

կան մտքի հիմնական ընթացքը: Այս է, ահա, մաշտոցյան դարի հայ դպրության մեծ խորհուրդը:

V դարի գրականությունը ստեղծվեց հին հայերենով՝ գրաբարով, որը մինչ այդ զարգացման բազմադարյան ուղի էր անցել, մշակվել, հղկվել էր որպես հեթանոս հայերի խոսակցական լեզու: Այդ են հաստատում վաղնջական դարերի ժողովրդական բանահյուսության՝ մեզ հասած բառացի նմուշները, որոնք լեզվական առումով չեն տարբերվում հայ առաջին դասական հեղինակների ստեղծագործությունների ու առաջին հայերեն թարգմանությունների լեզվից՝ ոսկեդարյան գրաբարից, որի կատարելության փայլուն ապացույցներն են՝ արդեն V դարում, հենց այդ ինքնուրույն ստեղծագործություններն ու թարգմանությունները: Վերջիններս շարքում հետազոտողները հատկապես առանձնացնում են Աստվածաշունչը, որի հայերեն թարգմանությունը Ֆրանսիացի հայագետ Լա Կրոզը բնութագրել է որպես «թարգմանությունների թագուհի», իսկ Յ. Կոնիբերն այն համարել է անգերադասելի՝ լիզվի ճոխության, գեղեցկության, մտքերի արտահայտման ճշգրտության առումով:

Բազմաժանր է (ներառյալ նաև թարգմանությունները) V դարի հայ գրականությունը. աստվածաբանություն և մեկնություն, ջատագովություն և հայրաբանություն, կանոն և ճառ, քարոզ և թողթ, վարքագրություն և վկայաբանություն, հոգևոր երգ և պատմագրություն:

V դարի հայ մատենագրության մեջ իր տեսակարար կշռով, արժեքով ու նշանակությամբ, ինչպես և հետագա դարերի հոգևոր մշակույթի վրա թողած ազդեցությամբ հատկապես առանձնանում է գրականության մոնումենտալ ժանրը՝ պատմագրությունը կամ պատմական արձակի ժանրը, որը իր ժամանակի համար եղավ քաղաքական-գաղափարական հզոր ղեկ և շարատեսից այնուհետև դարձրեց շարժման՝ հանդիսանալով ժողովրդի ազգային կյանքի պատմական ու գեղարվեստական տարեգրությունը. նրա հասարակական-քաղաքական իդեալների առավել ամբողջական ու բազմաբովանդակ արտահայտությունը: Առհասարակ իր ողջ պատմության ընթացքում հայոց հին և միջին դարերի դպրության այդ ժանրը զարմանալի «պայտուն» է եղել ժողովրդի կյանքի երևույթների նկատմամբ և իր զարգացման բոլոր փուլերում ակտիվորեն արձագանքել է իրականության առաջադրած հրատապ հարցերին:

Հայ առաջին դասական պատմիչների՝ քաղաքացիական կրթով հագեցված, ժողովրդի պատմական ճակատագրի մտահոգությամբ ամբողջովին ներթափանցված մատյաններում, իրոք, լավագույնս դրսևորվեցին ժամանակի ոգին, ժողովրդի քաղաքական կեցության ու հոգևոր կյանքի ամենակենսական պրոբլեմները, քան այդ կարող էին անել, ելնելով իրենց ժանրային նկարագրից և թեմատիկ ընդգրկման սահմանափակ շրջանակներից, մատենագրության այլ ժանրերի ստեղծագործությունները:

V դարի՝ հայ ժողովրդի պատմության այդ կարևոր շրջափուլի առաջնահերթ խնդիրներն էին՝ օտարի տիրապետության դեմ ուղղված ազատագրական պայքարը, երկրի կորցրած պետական անկախության վերականգնումը, ժողովրդի ազգային ինքնության պահպանումը, քրիստոնեության հետագա տարածումն ու արմատավորումը, որոնք և պայմանավորեցին առհասարակ հայ ազգային հոգևոր մշակույթի և մասնավորապես՝ պատմագրության ընդհանուր ուղղությունը, նրա սկզբնավորման ու ձևավորման օրինաչափություններն ու ժանրային ինքնատիպ հատկանիշները: Այս առթիվ միանգամայն հիմնավոր է թվում հայոց հին գրականության սկզբնավորման ու ձևավորման փուլին Մ. Աբեղյանի տված՝ «եկեղեցա-քաղաքական մաքառման գրականություն» բնորոշումը:

Առաջին դասական շրջանի հայ պատմագրության համար բնութագրական է ազգային ուրույն նկարագիրը՝ ինչպես բովանդակության, այնպես էլ ժանրային յուրահատկությունների առումով: Ճիշտ է, սկզբնավորվող հայ պատմագրությունը ստեղծագործորեն յուրացրեց հունական ու հելլենիստական, ինչպես նաև վաղ բյուզանդական պատմագրության լավագույն նվաճումներն ու ավանդները, բայց չդարձավ ո՛չ մեկի և ո՛չ էլ մյուսի պատճենավորումը:

Հալոց պատմագրությունն ինչպես իր ձևավորման փուլում, այնպես էլ զարգացման հետագա շրջանում ընթացավ սեփական ճանապարհով:

Պատմագրության ժանրի յուրահատկությունները բավական պարզորոշ ձևավորվեցին հենց նրա սկզբնավորման ու ամենաբարձր զարգացման փուլում՝ V դարի երկրորդ կեսին: Այդ յուրահատկությունները, ժողովրդի պատմական կյանքի պայմաններին համապատասխան, տարբեր դրսևորումներով իրենց ուժը պահպանեցին նաև հետագա դարերում:

V դարի դժվարին պայմաններում, երբ հայ ժողովրդի գլխին կախված էր իսպառ բնաջնջվելու, աղգային ինքնության կորստի ու գերիշխող ազգերի հետ միաձուլվելու ուժեղ վտանգը, կյանքն ավելի սուր պահանջներ էր առաջացրում աղգային հոգևոր մշակութային, մասնավորապես դրականությանը: Հանգամանքների բերումով հայ առաջին դասական հեղինակները, իրոք, յուրատեսակ տրիբուններ դարձան իրենց ժամանակի համար՝ մեծ պատասխանատվություն ստանձնելով աղդի ճակատագրի, իրենց ժամանակակիցների ու գալիք սերունդների առաջ: Հնարավորին չափ վեհ գույներով ներկայացնելով անցյալի փառավոր էջերն ու հիշարժան եղելությունները, նախնիների հերոսական գործերն ու ընդօրինակության արժանի ավանդները, մեր հին պատմիչներն ամեն կերպ միտել են ժամանակակիցների մեջ արթնացնել աղգային ինքնաճանաչման ու ինքնագիտակցության բարձր գաղափարը, նրանց մեջ պատվաստել վառ հայրենասիրության ոգին, սեփական ուժերի նկատմամբ խոր հավատի գիտակցությունը, աղդի ցրված ուժերի միավորման խորհուրդը, հանգամանքներ, որ այնքան անհրաժեշտ էին քաղաքական խիստ ծանր կացության մեջ ընկած ժողովրդի փրկության համար: V դարի հայ առաջին դասական հեղինակների նշանավոր ստեղծագործությունների գաղափարական բովանդակությունից ու ընդհանուր միտվածքից միանգամայն պարզ երևում է, որ այդ հեղինակների համար առանձնակի կարևորություն է ունեցել պատմական հեռանկարի հաստատումը, մի հանգամանք, որ էական չափով պայմանավորել է ոչ միայն պատմական նյութի ընտրության, ընկալման ու մեկնաբանության պատմագիտական ելակետերը, այլև այդ նյութի շարադրման, իմաստավորման փնդարհիտական ուղույն սկզբունքները: Հայ պատմիչների մեծ մասին ընդհանրապես և առաջին դասական հեղինակներին՝ մասնավորապես, միանգամայն խորթ է եղել պասսիվ հայեցողականությունը, նրանց համար պատմագրական մատյանների ստեղծումը ինքնանպատակ ու ինքնաբավ բան չի եղել: Ձևով դարկելով անցյալի եղելությունների շարադրմանը, այդ հեղինակները չեն նպատակադրվել լուր խնկարկելու անցյալը, չեն միտել մխիթարելու և մըխիթարվելու նրա հիշատակներով: Եվ եթե նրանց մագաղաթյա մատյաններում պատմվում, շարահարվում էին անցյալի հիշարժան եղելությունները (էլ չենք խոսում ժամանակակից անցքերի մասին), անգամ նախապատմական, վաղընչական դարերի առասպելները, վիպական դրույցներն ու ավանդությունները, այնուամենայնիվ, նրանց երկերը հուսցեալված էին աղդի առկա կեցությանն ու ապագային, որոնցով նրանց հեղինակները ջանում էին պատասխան տալ ժամանակակից իրականության առաջ քաշած կենսական հարցերին, որոնց շարքում առաջնահերթը, հարկավ, դարի հարցերի հարցն էր՝ ազատագրական մեծ մաքառումը, ժողովրդի ճակատագրի, նրա գոյատևման պրոբլեմը: Հեղինակային ակտիվ վերաբերմունքով ողջովին ներթափանցված իրենց ոգևորված մատյաններում մաշտոցյան դարի աղգային հեղինակները անցյալի մեջ համառորեն որոնում էին կործանման եղրին կանգնած հարադատ ժողովրդի փրկության ուղիներն ու գալիքի հուսատու հենարանները: Ամենից առաջ հենց սրանով է պայմանավորված հին դարերի հայ պատմագրական հուշարձանների դերն ու նշանակությունը ժողովրդի պատմության համար, նրանց արժեքը հայ ժողովրդի աղգային-աղատագրական պայքարի գաղափարախոսության մշակման առումով: Այս առիթով մեծ խորհուրդ ունեն Մովսես Խորենացու՝ աղգային արժանապատվության գիտակցությամբ ներծծված խոսքերը. «Զի թէպէտ և ևմբ ածու փոքր, և թուով յոյժ ընդ փոքու սահմանեալ, և զօրութեամբ տրկար, և ընդ այլով յոլով անգամ նուաճեալ թագաւորութեամբ՝ սակայն բաղում

գործք արութեան գտանին գործեալ ի մերում աշխարհիս, և արժան գրոյ յիշատակի...»¹։ Արժե վերստին վերհիշել նաև Վարդանանց պատերազմի պատմիչի՝ իր երկասիրութեան նպատակի բնութագրութիւնը, ըստ որի նրա մատնանք է «...միտքարութիւն սիրելեաց և յոյս յուսացելոց, քաջալերութիւն քաջաց, կամակարութեամբ յարձակեալ ի վերայ մահուան...»²։ Առանձնապէս կարևոր է վերջինը՝ «քաջալերութիւն քաջաց»։ Միանգամայն պարզ է, որ այս նպատակով գրված երկերը չէին կարող սահմանափակվել եղելութիւնների արձանագրային, շոր ու անկիրք շարադրանքով, չէին կարող ժամանակագրութիւնների կերպ ունենալ։ Նրանց մեջ անցյալը ներկայանում է որպէս կենդանի, շնչող իրականութիւն։ Մաշտոցյան դարի հայ դասական առաջին պատմիչների այս նպատակագրումին առավել քան ներդաշնակում էր շարադրանքի գեղարվեստական ոճը, հուզական շեշտը, բոցաշունչ ու ոգևորիչ խոսքը։ Տրապարակախոսական լիցքը, առանց որի նրանց ստեղծագործութիւնները ցանկալի ազդեցութիւն չէին կարող ունենալ հասարակութեան լայն շրջաններին վրա, կղանային վանական վարդապետների լոկ նեղ շրջանի սեփականութիւնը։ Պիտի կարծել, որ մի զգալի չափով գեղարվեստական ոճի ու ճարտասանական արվեստի շնորհիվ էր, որ այդ ստեղծագործութիւնները դարեր շարունակ տիրական իշխանութիւն ունեցան ոչ միայն ժամանակակիցների, այլև հետնորդ բազում սերունդների մտքերի ու զգացմունքների վրա, դարձան հանապազ ընթերցանութեան մատնաներ՝ մարդկանց ուսուցանելով ոչ միայն իրենց ազգի պատմութիւնը, այլև նրանց ոգեշնչելով, մղելով նոր սխրանքների։ Մաշտոցյան դարի նշանավոր քերթողների սեւեռուն նպատակն է եղել ժողովրդի մեջ արթնացնել վեհ գաղափարներ, վերափոխել կյանքը, հաստատել գեղեցիկի իդեալը, սերմանել անսասան հավատ բարու և ճշմարիտի հաղթանակի նկատմամբ։ Եվ միանգամայն պարզ է, որ գեղարվեստական ոճը, հետնորդական բարձր արվեստն ու շունչը ոչ թե մեր հին պատմական երկերի պակասութիւնն է, այլ նրանց ակնհայտ սուսփութիւնն ու արժանիքը։

Ժանրային առումով V դարի հայ պատմագրութիւնն, իսկապէս, հատկանշվում է երկակի բնույթով։ Այդ պատմագրութեան երկերը պատմական արժեքավոր սկզբնաղբրերն են լինելով հանդերձ, որ միանգամայն անտարակուսելի է, միաժամանակ հանդիսանում են մեր հին գեղեցիկ գրականութեան առաջին և նույնքան արժեքավոր նմուշները, որոնք օժտված են, իրոք, գեղարվեստական ստեղծագործութեան մի շարք բնորոշ հատկութիւններով՝ պատմական անձերի յուրատեսակ անհատականացում-տիպականացում (իհարկէ, իր ժամանակի գեղագիտական ըմբռնումների չափանիշներով), էպիկական բարձր ոճ, հուզական ինքնատիպ լիցք, քնարական վարակիչ շնչով հագեցված գեղեցիկ հատվածներ, պատկերավոր լեզու, կենդանի երկխոսութիւններ, երբեմն հանդիպող բնութեան նկարներ պատկերներ և այլն, որ բոլոր հիմքերը տալիս է հայ առաջին դասական հեղինակների պատմական երկերը բնութագրելու նաև որպէս գեղարվեստական արձակի, թերևս ավելի ստույգ՝ պատմական արձակի ստեղծագործութիւններ, որոնց մեջ պատմականն ու վիպականը ոչ թե միասնիկական միացութեան բաղադրիչներ են, այլ հանդես են գալիս որպէս ամբողջական ու ներդաշնակ համաձուլվածքի օրգանական տարրեր, ուր հաճախ անհնարին է որոշել, թե որտեղ է ավարտվում մեկը և որտեղից սկսվում մյուսը։ Ընդ որում, հաճախ է համարում հատուկ քննարկել, որ գեղարվեստական միջավայրում արձակի և պատմական սկզբնաղբրերի, այլ, ընդհակառակը, դրանք օժտված, հարստացնում է նոր գծերով, որոնք սլայմանավորում են հայոց հին պատմագրական երկերի նշանակութիւնը՝ նաև ազգային գեղարվեստ-

1 Մովսիսի խորհրդանշան Պատմութիւն Հայոց. աշխատութեամբ Մ. Արեղյան և Ս. Հարութիւնյան. Տփլիս, 1913, I, 9, էջ 10։

2 Եղիշէի Վասն Վարդանայ և Հայոց պատերազմին. ի լոյս ածեալ բաղդատութեամբ ձեռագրաց, աշխատութեամբ Ե. Տեր-Մինասեան. Երևան, 1957, էջ 4—5։

տական մտածողության սկզբնավորման ու զարգացման տեսակետից: Եվ սա հալոց հին պատմագրության մի կարևոր առանձնահատկությունն է³:

Մեր հին պատմագրությունն այս հատկանիշը ամենայն հավանականությամբ ժառանգել է անտիկ (հատկապես հունական) պատմագրությունից, որի՝ ճարտասանական բարձր արվեստով գրված երկերից շատերը, ինչպես հայտնի է, միաժամանակ դասվում են նաև գեղարվեստական գրականության ստեղծագործությունների շարքը: Այս առիթով տեղին է հիշել Յիցերոնին, որի բնութագրությամբ պատմությունը (= պատմագրական երկը) «դա մի գործ է, որ բոլորից շատ վայել է ճարտասանին» («Opus hoc unum maxime orationis») ⁴: Մեկ այլ առիթով խոսելով պատմագրի ստեղծագործական աշխատանքի յուրահատկությունների մասին, Յիցերոնը նշել է, որ գործողությունները նկարագրելիս նրա ղխավոր խնդիրներից մեկն է «ցույց տալ ոչ միայն թե ի՛նչ, այլև ինչպե՛ս է տեղի ունեցել կամ ասվել»⁵, մի հատկանիշ, որ, ինչպես հայտնի է, բնորոշ է գրական ժանրերի ստեղծագործություններին:

Պատմագրական երկին ներկայացվող նման պահանջը իրականում պայմանավորված է եղել ժամանակի պատմագեղագիտական մտածողության յուրահատկություններով: Անտիկ պատմագրության ու դասական բանասիրության նշանավոր մասնագետ ակադեմիկոս Ս. Ա. Ժեբելյովի դիտումով «...հընում (խոսքը անտիկ շրջանի մասին է—Վ. Լ.) պատմական ստեղծագործությանը նայել են ոչ միայն իբրև գիտական ստեղծագործության, այլև որպես գրական ստեղծագործության, և հնարավոր է, որ առաջինի նկատմամբ այս երկրորդ հանգամանքին գիտակցաբար առաջնություն է տրվել»: Հետազոտողը դա բացատրում է նրանով, որ «հին պատմիչի ստեղծագործությունը նախատեսվում էր նախ և առաջ ընթերցանության և ապա միայն, ցանկացողների համար՝ ուսումնասիրության համար»⁶: Անախկ պատմագրության խոշորագույն գեմբի՝ Թուկիդիդեսի խոստովանությամբ նա իր երկը գրել է «ոչ այնքան նրա համար, որ այն բանավոր մրցակցության առարկա լինի տվյալ պահին, որքան նրա համար, որ այն լինի հավերժ սեփականությունը»⁷: Ըստ երևույթին, հետևելով անտիկ հայացքներին, նույն կամ գրեթե նույն տեսանկյունով են բնկայել իրենց պատմագրական երկերի նպատակը նաև V դարի հայ պատմիչները, որոնց անցյալի փաստերը հետաքրքրում էին ոչ միայն պատմական տեսակետից, այլև գեղարվեստական հայեցակետով: Երիշեն, օրինակ, հատուկ շեշտել է այն հանգամանքը, որ իր մատյանը գրվել է որպես հայապաղ ընթերցանության գիրք՝ միաժամանակ դրա հետ կապելով նրա խրատական-բարոյախոսական նպատակը: Գորի ընծայականում, դիմելով իր պատմիչի անունը, լսելով դառաբինեացի դքսչություն, և ղյետս կացելոցն ղվատթարություն...»⁸: Նույնքան ուշագրավ են պատմիչի խոսքերը, որով նա ավարտում է դավաճան Վասակ Սյունու անփառունակ վախճանի նկարագրության

³ Այս մասին տե՛ս Մ. Ա. Բեդյան. երկեր. հ. Գ, Երևան, 1968: Մ. Ա. Բեդյան. Հայ գեղարվեստական արձակի սկզբնավորումը (V դար). Երևան, 1971: Մեր՝ «Уроки армянской древности» (Ереван, 1985) գրքի «Поэтика Египта» հատվածը և այլուր:

⁴ Цицерон. О государстве—О законах. Издание подготовили И. Н. Веселовский, В. О. Горенштейн, Н. С. Утченко. М., 1966, О законах, кн. I, гл. II, с. 90: Հմմտ. տե՛ս Ի. Թ. Լիվի, критическое исследование. Перевод с французского Е. И. Герье. Второе исправленное издание. М., 1900, с. 17, прим. № 1.

⁵ Цицерон. Три трактата об ораторском искусстве. Перевод с латинского Ф. А. Петровского, И. П. Стрельниковой, М. Л. Гаспарова, под редакцией М. Л. Гаспарова. М., 1972, с. 142.

⁶ Фукидид. История. Перевод Ф. Мищенко, в переработке, с примечаниями и сопоставительным очерком С. Жебелева. Т. II, М., 1915, с. XX.

⁷ Նույն տեղում. հ. I, էջ 16:

⁸ Նույն տեղում, էջ 4:



հատվածը. «Գրեցաւ յիշատակարանս այս վասն նորա, առ ի կշտամբումն յանդիմանութեան մեղաց նորա. զի ամենայն՝ որ զայս լուեալ գիտասցէ, նզովս ի հետ արկցէ, և մի՛ լիցի ցանկացող գործոց նորա»⁹:

Անդրադառնալով Թուկիդիդեսի՝ իր պատմական ստեղծագործական երկի գրական հատկանիշների մասին ունեցած պատկերացումին, Ս. Ժեբելյովը նրկատել է, որ հին պատմիչի մոտեցումը ելնում էր նրանից, որ «...անտիկ, հունահռոմեական աշխարհում պատմությունը նախ և առաջ վերաբերում էր գրական մարզին և ապա միայն՝ գիտական ստեղծագործության բնագավառին, և պատմիչը հակված էր իրեն դասելու գրողների շարքը, քան՝ գիտնականների թվին»¹⁰: Հետազոտողի կարծիքով, հենց գրական ձևի շնորհիվ էր ապահովվում պատմական ստեղծագործության՝ «հավերժին պատկանելու» հանգամանքը¹¹: Հիշենք Ս. Ժեբելյովի մի դիտողությունը ևս, ըստ որի «...այն պատմիչները, որոնց երկերը արդեն իսկ իրենց բովանդակությամբ գտնվում էին գրականության և գիտության սահմանում, պետք է մտահոգվեին հնարավորին չափ նրանց գրական պարուրակ տալու խնդրով: Դա էլ հենց հանգիստաց աչն բանին, որ անտիկ գրականության պատմության մեջ պատմագրական բնույթի ստեղծագործությունները, չհաշված մի քանի բացառություններ, հավասար տեղ են գրավում բացառապես գրական խնդիրներ հետամտող ստեղծագործությունների հետ միասին»¹²: Անտիկ պատմագրության ժանրային յուրահատկությունների, մասնավորապես նրա գեղարվեստականության մասին հետաքրքրաբան Հիպպոլիտ Տենը, որ շահեկան կարող են լինել հայոց հին պատմագրության որոշակի հատկանիշները ըստ ամենայնի մեկնաբանելու առումով: Հ. Տենի դիպուկ բնութագրությամբ «պատմիչի նկարագրած կյանքը չոր բանաձև չէ, այլ՝ բարդ դրամա, ուր օրենքները գործում են գործողությունների միջոցով» և «եթե փաստերը զրկենք նրանց կյանք տվող անմիջական կրթից ու նրանց լուսավորող կենդանի գունավորումից, ապա՝ նրանք մեր միտքը կներթափանկան ոչ լրիվ և ոչ ստույգ»: «Թող բնության նման, — շարունակում է Տենը, — պատմությունն ազդի սրտի ու զգացմունքի վրա, թող բանականության մեջ վերակենդանացած անցյալը հարուստն առնի մեր երևակայության առջև: Մինչև այստեղ մենք գործ ունենինք միայն մեռած նյութի ու չգործող օրենքների հետ: Բայց, ահա, նրանք հոգու աստվածային ներշնչումով հարուստն առան, շարժման մեջ դրվեցին: Գիտությունը դառնում է արվեստ»¹³: Հ. Տենը հատուկ շեշտել է, որ երբ խոսքը մասնավորապես վերաբերում է անտիկ պատմագրությանը, ապա այստեղ, իրոք, «պատմիչի մեջ արվեստագետին անհնար է անջատել գիտնականից», որովհետև, ինչպես կարծում է հետազոտողը, «եթե վերցնենք պատմության մեջ արվեստի տարբեր գրականությունները, ապա կտեսնենք, որ նրանք կատարյալ են միայն գիտության կատարելության շնորհիվ, և որ կատարելության հասած գիտությունն ինքնին ծնում է կատարյալ արվեստ»¹⁴:

Եթե դարձյալ նկատի չունենանք առանձին բացառություններ (որոնց, ի դեպ, V դարի հայ պատմագրության մեջ, թերևս, ալեկի սակավ կարելի է

⁹ Նույն տեղում, էջ 140.

¹⁰ Ф у к н д и д. Указ. соч., т. II, с. LXX.

¹¹ Տե՛ս նույն տեղում:

¹² Նույն տեղում: Հայտնի է առհասարակ, որ հունահռոմեական անտիկ աշխարհում առանձնահատուկ ուշադրություն էր դարձվում գեղարվեստական ձևին ու շարադրանքի ճարտասանական կատարելությանը. անգամ բնական գիտությունների ներկայացուցիչներն էլ «աշխատում էին գրել վայելուղ կամ, իսկապես, զեպում՝ գրականորեն, և այդ պայմանը պահպանելու զեպում միայն կարող էին հուսալ իրենց ստեղծագործություններով ընթերցողների լայն շրջանների հետաքրքրությունը շարժելու» (նույն տեղում):

¹³ Н. Т э н. Указ. соч., с. 207—208.

¹⁴ Նույն տեղում, էջ 208—209:

դէպքերը և Ասորեստանեայց, Եգիպտացւոց և Հելլենացւոց...»¹⁶։ Ուշագրավ է, որ Քերթովաճաշարը շեշտը հատկապէս գնում է «աշխարհական կարգերի» գիտութիւնն ձեռք բերելու և «Բաղաճական կարգեր» սովորելու վրա, պատմութիւնն դասերը հենց այս հայացքով ընկալելով, նրանց օգտակարութիւնը ա՛յս իմաստով հասկանալով։ Այստեղից էլ՝ հայոց հին պատմագրութիւնն գերազանցապէս աշխարհիկ-քաղաքական բովանդակութիւնն ու ընդգծված քաղաքացիական լիցքը։

Քաղաքացիական լիցքի հետ միասին հայոց հին պատմիչների ստեղծագործութիւններին, իհարկէ տարբեր չափով ու շեշտվածութեամբ, բնորոշ է հրապարակախոսական բնավորութիւնը։ Իսկապէս առած, հայոց հին պատմագրութիւնը, որի երկերն ստեղծվել են միանգամայն որոշակի նպատակադրվածությամբ, իր էութեամբ հրապարակախոսական է, ուր ամենուրեք բացորոշ արտահայտվել է հեղինակների ակտիվ ու կրքոտ վերաբերմունքը, նրանց համակրութիւններն ու հակակրութիւնները շարահարված եղբայրութիւնների, պատմական գործիչների արարքների վերաբերյալ։ Այս հանգամանքն առավել որոշակիութեամբ արտահայտվել է ոչ միայն պատմական երևույթների պատճառաբանութեան մեջ, այլև հեղինակային շեղումների և մեծ մասամբ հասարակական բովանդակությամբ հատկանշվող նրանց սեփական զգացմունքների դրսևորումների մեջ, որոնք, հեղինակային միտումը ի հայտ բերելու հետ միասին, յուրովի նպաստում են պատմագրած նյութի, ողջ ստեղծագործութիւնն ներքին էութեան բացահայտմանը։

V դարի հայ պատմագրութիւնը հասուկ է պատմական կյանքի լայն ու բազմազան ընդգրկումը։ Հայոց հին պատմագրութեան երկերում ժողովրդի հասարակական-քաղաքական, սոցիալ-տնտեսական ու կրոնական կյանքի կարևոր իրողութիւններից բացի, բավական լայն տեղ են գտել նաև ազգագրական, աշխարհագրական, բանահյուսական և այլ կարգի բազմաթիվ ու բազմաբնույթ նյութեր, որոնք մեծապէս հարստացնում, ամբողջական են դարձնում անցյալի կյանքի պատկերը։

Սակայն հայոց հին և միջին դարերի պատմագրութիւնն իր նշանակութեամբ շատ բանով դուրս է գալիս ազգային շրջանակներից և կարևոր արժեք է ստանում համաշխարհային պատմագիտական մտքի առումով։ Բանն այն է, որ մեր պատմագրական երկերում հայ ժողովրդի պատմութիւնը տրվում է ոչ թէ մեկուսի, այլ այն ժողովուրդների ու տերութիւնների պատմութեանը գուցահեռ, նրանց պատմութեան հետ կապակցված, որոնց, հանգամանքների բերումով, այս կամ այն ձևով առնչվել է հայ ժողովուրդը հարյուրամյակներ շարունակ։ Մաշտոցյան դարի պատմագրութեան այս կարևոր յուրահատկութիւնը ևս փոխանցվեց հաջորդ դարերին։ Առհասարակ կյանքի լայն ընդգրկման շնորհիվ է, որ հայոց հին և միջին դարերի պատմագրական մատյաններում բազմաթիվ արժեքավոր, երբեմն նույնիսկ եղակի տվյալներ են պահպանվել մասնավորապէս սասանյան Պարսկաստանի ու Բյուզանդիայի, վրացիների, աղվանների ու արաբների, հետագա դարերում՝ նաև խաչակիրների, թուրք-սելջուկների, մոնղոլների, օսմանյան թուրքերի և այլ ժողովուրդների պատմութեան վերաբերյալ, որ մեծապէս բարձրացնում է հայ պատմագրական հուշարձանների պատմաճանաչողական արժեքը՝ առհասարակ հանուր մարդկութեան պատմութեան գիտական ուսումնասիրութեան հայեցակետով։

V դարի հայ պատմագրութեան համար բնութագրական է նրա սերտ կապը ժողովրդական բանահյուսութեան հետ, բոլոր հանդիսացավ պատմագրութեանը սնող հիմնական ակունքներից մեկը, նրա հարուստ դիմարանը։ Եթե V դարում մի կողմից հետևողական պայքար էր մղվում հեթանոսութեան մնացուկների դեմ, ապա, մյուս կողմից՝ առաջին դասական հեղինակները, ելնելով մատենագրութեան առջև կանգնած խնդիրներից ու նորաստեղծ ազգային գրականութեան միտումներից, դիմում են հեթանոս նախնիների բանավոր

¹⁶ Խ ո Ր Ե Ն Ա Յ Ի, էջ 10։

գրականության կերտվածքներին՝ նրանից քաղելով ազգային անցյալի վերաբերյալ տվյալներ ու փաստեր: Դրանով իսկ այդ հեղինակները հանդես են բերել իր ժամանակի համար, իրոք, բացառիկ պատմափիլիսոփայական լատենտություն, պատմամշակութային սթափ զգացողություն: V դարի իրականության պահանջներով կյանքի կոչված գրականության ստեղծողների մեջ արքանացավ բուն հետաքրքրություն ժողովրդի անցյալի նկատմամբ, և նրանց առջև բացվեց մի զարմանալի հարստություն՝ վաղնջական դարերի ժողովրդական բանավեստի հարուստ գանձարանը: Բանահյուսության ստեղծագործությունները, որ աչքի էին ընկնում առասպելական ու պատմական սյուժեների կառուցման արվեստով, արտահայտչական միջոցների ու ձևերի բազմազան հարստությամբ, կերպարների մեկնաբանման ինքնատիպությամբ, հայրենասիրության զգացումի բարձր դրսևորումներով, եղելությունների ընկալման ժողովրդական ուրույն հայեցակետով, միանգամայն ներդաշնակում էին պատմագրության միտումներին, առաջին հեղինակների պատմագիտական ու գեղագիտական սկզբունքներին: Բանավոր գրականության ստեղծագործությունները ոչ միայն նպաստեցին պատմագրության աշխարհիկ ոգու ձևավորմանն ու դարգացմանը, նրա գեղարվեստական ուրույն ոճի մշակմանը, այլև գրականության մեջ բերեցին ժողովրդական մտածողության բնորոշ գծերը՝ պայմանավորելով հայոց հին գրականության գաղափարական բովանդակության ու արվեստի որոշակի յուրահատկությունները: Համարձակ կարելի է ասել, որ առանց ժողովրդական բանավեստի արժեքավոր ավանդների օգտագործման հաղիվ թե հնարավոր լինե՞ր այնպիսի բարձր մակարդակով, իր ողջ հարստությամբ ու կենսական գույներով իրականացնել անցյալի փառավոր էջերի ու հերոսական նախնիների կերպարների վերակենդանացումը (որ միանգամայն ներդաշնակում էր առաջին հեղինակների փայփայած իդեալներին), որին հասավ V դարի հայ պատմագրությունը:

Բանահյուսական ավանդների օգտագործման առումով որոշակի հետաքրքրություն են ներկայացնում նաև առանձին նախարարական տների տոհմական դրույցները, որոնք եթե ազգային գրականության ստեղծումից առաջ ապրում էին մի տեսակ առանձնակի կյանքով (հիմնականում, հավանաբար, տվյալ նախարարական տոհմի տիրույթի շրջանակներում), բերանացի հաղորդվելով սերնդ-սերունդ, ապա գրականության սկզբնավորման շրջանում հենց դրանք հիմնականում ձուլվեցին հայ ժողովրդի պատմության ընդհանուր հյուսվածքին, գիտակցվեցին իբրև ընդհանուրի բաղկացուցիչ մաս՝ թերևս մասամբ միայն պահպանելով իրենց «տոհմական» առանձնությունը:

Հայոց հին պատմագրության՝ վերը բնութագրված յուրահատկությունը իր ցայտուն դրսևորումն է ստացել V դարի հեղինակներից հատկապես Ազաթանգեղոսի, Խորենացու և Փավստոսի պատմագրական ստեղծագործություններում: Նույնը չեն, հարկավ, բանահյուսական հորինվածքների ընտրության, նրանց օգտագործման մեթոդներն ու եղանակները: Դրանք պայմանավորված են տվյալ երկի նպատակով, հեղինակի դավանած պատմափիլիսոփայական ու գեղագիտական սկզբունքներով, նրա ստեղծագործական անհատականությամբ ու խառնվածքով, ժողովրդական բանավեստի քերթվածների նկատմամբ ունեցած վերաբերմունքով: Եթե հայոց դարձի մասին պատմագրող Ազաթանգեղոսին զերադանցապես հետաքրքրում են կրոնական լեզնեղները, տեսիլքներն ու հրաշապատում դրույցները, ապա Փավստոս Բուզանդի համար, որի ստեղծագործության առանցքը երկրի աղատության գաղափարն է, առաջնահերթը հերոսավալկարն ու վիպական ավանդություններն են, իսկ իր ժողովրդի ծննդաբանությունը, ազդի տոհմագրությունը, ժողովրդի ամբողջական պատմությունը շարահյուսող Խորենացուն առավելապես գրավում են վաղնջական դարերի առասպելները, վիպասանքը, դրույցներն ու երգերը, որոնցից նա քաղում է գրավոր աղբյուրներում բացակայող տվյալները՝ քննական ճանապարհով ջանալով բացահայտել նրանց մեջ թաքնված այլաբանական ճշմարտությունները: Ի տարբերություն Բուզանդի, որ հաճախ իր ստեղծագործության մեջ գրեթե նույնությամբ մուծում է ժողովրդական գրույցը կամ ա-

վանությունը, խորհնացու մոտ բանահյուսական հյուսվածքների վերադասարկման մեջ զգալի են հեղինակային միջամտություններն ու մեկնությունները և այլն: Բոլոր դեպքերում բանահյուսական ստեղծագործությունները մեծ չափով հարստացրել են հայոց հին պատմագրական հուշարձանները ինչպես բովանդակության, այնպես էլ գեղարվեստական ձևի առումով:

Ժողովրդական բանահյուսության հետ ունեցած սերտ կապը ևս ժառանգվեց հետագա դարերի պատմիչների կողմից: VII—IX դդ. պատմագրական ստեղծագործությունների շարքում այս առումով հատկապես առանձնանում են Հովհան Մամիկոնյանի, մասամբ նաև Մովսես Կաղանկատվացու պատմական մատյանները, որոնց մեջ առավել ակնբախ էրպով դրսևորվեցին V դարի պատմագրության հայտնի ավանդները:

Մի կարևոր յուրահատկության սասին ես: Ինչպես V դարի, այնպես էլ հետագա դարերի պատմագրական մի շարք երկեր, թեև գրվել են առանձին նախարարական տների ներկայացուցիչների պատվերով, և թեև նրանցում ակնհայտ է այս կամ այն նախարարական տոհմի դերի բարձրացման որոշակի միտումը, բայց ամբողջությամբ վերցրած հայոց հին և միջին դարերի պատմագրական ստեղծագործություններում հայ ժողովրդի և հայոց երկրի պատմությունն ընկալվում է որպես մի միասնական ամբողջություն: Հայ ժողովրդի և ողջ հայոց երկրի ճակատագրով խորապես մտահոգված մեր հին պատմիչների ստեղծագործություններն, իրոք, նախ և առաջ արտահայտում էին համահայկական, համադարյն քաղաքական շահերը՝ գերսուղասելով դրանք առանձին նախարարական տների շահագրգռություններին: Միանգամայն ակնհայտ է այն վիթխարի նշանակությունը, որ միասնական պետականության շարունակություն ու երկրի հեղաշրջման մասնատվածության պայմաններում ունեցել է այս մտայնության ամուր հիմքը՝ վրա ստեղծված ազգային պատմագրությունը՝ ողջ հայության քաղաքական ճակատագրի, համահայկական-համադարյն քաղաքականության մշակման առումով:

Հնդհանուր: գծերով, ահա, սրանք են V դարի հայ պատմագրության առավել էական յուրահատկությունները:

С НЕКОТОРЫХ ОСОБЕННОСТЯХ АРМЯНСКОЙ ИСТОРИОГРАФИИ V в.

Член-корр. АН АрмССР В. С. НАЛБАНДЯН

Резюме

В отличие от других литератур древности и средневековья, которые возникли на основе переводов, формирование оригинальной древнеармянской литературы происходило параллельно с переводной. Уже в V веке, сразу же после создания национальной письменности, в течение лишь нескольких десятилетий появились первые классические произведения армянской литературы—исторические труды Корюна и Агатангехоса, Егише и Хоренаци, Павстоса и Парбеци, философско-богословский трактат Езника Кохбаши, которые возвестили рождение большой национальной литературы. В многожанровой литературе V в. своей значимостью, а также воздействием на всю армянскую духовную культуру последующих веков выделяется историография, или жанр исторической прозы, которая, с одной стороны, творчески усвоила традиции античной, эллинистической и ранневизантийской историографии, а с другой—с самого начала обрела свой национальный облик и встала на собственный путь развития. Именно в V в. четко сформировались наиболее существенные особенности армянской историографии: светско-политическое содержание, грандиозный гражданский пафос и публицистическая страстность, всеармянское—общенациональное мышление, тенденция к утверждению исторической перспективы, тесная связь с устным народным творчеством, высокое художественное и риторическое искусство, широта охвата действительности, нередко выходящая за пределы национального, благодаря чему древняя армянская историография приобрела общечеловеческую ценность и всемирное значение.